

223671

孝經唐玄宗御注
論語何氏等集解
孟子趙注

(十三經古注)

中華書局印行



孝

經

《四部備要》

經部

上海中華書局據永懷堂

本校刊

桐鄉

陸費達總勘

杭縣

高時顯輯校

杭縣

吳汝霖校


丁輔之監造

版權所有不許翻印

孝經序

夫孝經者孔子之所述作也述作之旨者昔聖人蘊大聖德生不偶時適值周室衰微王綱失墜君臣僭亂禮樂崩頽居上位者賞罰不行居下位者褒貶無作孔子遂乃定禮樂刪詩書讚易道以明道德仁義之源修春秋以正君臣父子之法又慮雖知其法未知其行遂說孝經一十八章以明君臣父子之行所寄知其法者修其行知其行者謹其法故孝經緯曰孔子云欲觀我褒貶諸侯之志在春秋崇人倫之行在孝經是知孝經雖居六籍之外乃與春秋爲表裏矣先儒或云夫子爲曾參所說此未盡其指歸也蓋曾在七十弟子中孝行最著孔子乃假立曾子爲請益問答之人以廣明孝道既說之後乃屬與曾子洎遭暴秦焚書並爲煨燼漢膺天命復闡微言孝經河間顏芝所藏因始傳之於世自西漢及魏歷晉宋齊梁註解之者迨及百家至有唐之初雖備祕府而簡編多有殘缺傳行者唯孔安國鄭康成兩家之註并有梁博士皇侃義疏播於國序然辭多紕繆理昧精研至唐玄宗朝乃詔羣儒學官俾其集議是以劉子玄辨鄭註有十謬七惑司馬堅斥孔註多鄙俚不經

其餘諸家註解皆榮華其言妄生穿鑿明皇遂於先儒註中採撫菁英芟去煩亂撮其義理允當者用爲註解至天寶二年註成頒行天下仍自八分御札勒于石碑卽今京兆石臺孝經是也成都府學主鄉貢傳注泰右撰



孝經目錄

卷一

開宗明義章第一

天子章第二

卷二

諸侯章第三

卿大夫章第四

士章第五

卷三

庶人章第六

三才章第七

卷四

孝治章第八

卷五

聖治章第九

卷六

紀孝行章第十

五刑章第十一

廣要道章第十二

卷七

廣至德章第十三

廣揚名章第十四

諫諍章第十五

卷八

感應章第十六

事君章第十七

卷九

喪親章第十八

孝經卷一

漢 鄭氏註

明後學東吳金 蟠訂

開宗明義章第一

仲尼居

仲尼孔子字居謂開居

曾子侍

曾子孔子弟子侍謂侍坐

子曰先王有至德要道以順天下民用和睦上下無

怨

孝者德之至道之要也言先代聖德之王能順天下人心行此至要之化則上下臣民和睦無怨

汝知之乎曾子避席曰參不敏何足以知之

參曾子名也禮師有問避席起答敏達也言參不達何足知此至要之義

子曰夫孝德之本也

人之行莫大於孝故為德本

教之所由生也

言教從孝而生

復坐吾語汝

曾參起對故使復坐

身體髮膚受之父母不敢毀傷孝之始也

父母全而生之己當全而歸之故不敢毀傷

立身行道揚名於後世以顯父母孝之終也

言能立身行此孝道自然名揚後世光顯其親故行孝以不毀為先揚名為後

夫孝始於事親中於事君終於立身

言行孝以事親為始事君為中忠孝道著乃能揚名榮親故曰終於立身也

大雅云無念爾祖聿修厥德

詩大雅也無念念也聿述也厥其也義取恆念先祖述修其德

天子章第二

子曰愛親者不敢惡於人

博愛也

敬親者不敢慢於人

廣敬也

愛敬盡於事親而德教加於百姓刑子四海

刑法也君行博愛廣敬之道使人皆不慢惡其親則德教加被天下當為四夷之所法則也

蓋天子之孝也

蓋猶略也孝道廣大此略言之

甫刑云一人有慶兆民賴之

甫刑即尚書呂刑也一人天子也慶善也十億曰兆義取天子行孝兆人皆賴其善

孝經卷一

孝經卷二

漢 鄭氏註

明後學東吳葛 肅訂

諸侯章第三

在上不驕高而不危

諸侯列國之君貴在人上可謂高矣而能不驕則免危也

制節謹度滿而不溢

費月約儉謂之制節慎行禮法謂之謹度無禮為驕奢泰為溢

高而不危所以長守貴也滿而不溢所以長守富也

富貴不離其身然後能保其社稷而和其民人

列國皆有社稷其君主而祭之言富貴也

蓋諸侯之孝也詩云戰戰兢兢如臨深淵如履薄冰

戰戰兢兢戰戰兢兢取為君恆戒懼

卿大夫章第四

非先王之法服不敢服

服者身之表也先王制五服各有等差言卿大夫遵守禮法不敢僭上偏下

非先王之法言不敢道非先王之德行不敢行

法言謂禮法之言德行謂道德之行言非法行非德則虧孝道故不敢也

是故非法不言非道不行

言必守法行必遵道

口無擇言身無擇行

言行皆遵法道所以無可擇也

言滿天下無口過行滿天下無怨惡

禮法之言焉有口過道德之行自無怨惡

三者備矣然後能守其宗廟

三者服言行也禮卿大夫立三廟以奉先祖言能備此三者則能長守宗廟之祀

蓋卿大夫之孝也詩云夙夜匪懈以事一人

夙早也懈懈也義取為卿大夫能早夜不惰敬事其君也

士章第五

資於事父以事母而愛同資於事父以事君而敬同

資取也言愛父與母同敬父與君同

故母取其愛而君取其敬兼之者父也

言事父兼愛與敬也

故以孝事君則忠

移事父孝以事於君則為忠矣

以敬事長則順

移事兄敬以事於長則為順矣

忠順不失以事其上然後能保其祿位而守其祭祀

能盡忠順以事君長則常安祿位永守祭祀

蓋士之孝也詩云夙興夜寐無忝爾所生

取辱也所生謂父母也義
取早起夜寐無辱其親也

孝經卷二

孝經卷三

漢鄭氏註

明後學東吳金蟠訂

庶人章第六

用天之道

春生夏長秋收冬藏奉事順時此用天道也

分地之利

分別五土視其高下各盡所宜此分地利也

謹身節用以養父母

身恭謹則遠恥辱用節省則免饑寒公賦既充則私養不闕

此庶人之孝也

庶人為孝唯此而已

故自天子至於庶人孝無終始而患不及者未之有也

也

始自天子終於庶人尊卑雖殊孝道同致而患不能及者未之有也言無此理故曰未有

三才章第七

曾子曰甚哉孝之大也

參聞行孝無限高卑始知孝之為大也

子曰夫孝天之經也地之義也民之行也

經常也利物為義孝為百行之首人之常德若三辰運天而有常五土分地而有義也

天地之經而民是則之

天有常明地有常利言人法則天地亦以孝為常行也

則天之明因地之利以順天下是以其教不肅而成

其政不嚴而治

法天明以需常因地利以行義順此以施政教則不待嚴肅而成理也

先王見教之可以化民也

見因天地教化民之易也

是故先之以博愛而民莫遺其親

君愛其親則人化之無有遺其親者

陳之以德義而民興行

陳說德義之美為眾所慕則人起心而行之

先之以敬讓而民不爭

君行敬讓則人化而不爭

導之以禮樂而民和睦

禮以檢其跡樂以正其心則和睦矣

示之以好惡而民知禁

示好以引之示惡以止之則人知有禁令不敢犯也

詩云赫赫師尹民具爾瞻

赫赫明盛貌也尹氏為太師周之三公也義取大臣助君行化人皆瞻之也

孝經卷三

孝經卷四

漢 鄭氏註

明後學東吳葛 雍訂

孝治章第八

子曰昔者明王之以孝治天下也

言先代聖明之王以至德要道化人是為孝理

不敢遺小國之臣而況於公侯伯子男乎

小國之臣至卑者耳王尚接之以禮況於五等諸侯是廣敬也

故得萬國之歡心以事其先王

萬國舉其多也言行孝道以理天下皆得歡心則各以其職來助祭也

治國者不敢侮於鰥寡而況於士民乎

鰥寡謂諸侯也鰥寡國之微者君尚不敢輕侮況知禮義之士乎

故得百姓之歡心以事其先君

諸侯能行孝理得所統之歡心則皆恭事助其祭享也

治家者不敢失於臣妾而況於妻子乎

理家謂卿大夫臣妾家之親者妻子家之貴者

故得人之歡心以事其親

卿大夫位以材進受祿養親若能孝理其家則得小大之歡心助其奉養

夫然故生則親安之祭則鬼享之

夫然者上孝理皆得歡心則存安其榮沒享其祭

是以天下和平災害不生禍亂不作

上敬下懼存安沒享人用和睦以致大平則災害禍亂無因而起

故明王之以孝治天下也如此

言明王以孝為理則諸侯以下化而行之故致如此福應

詩云有覺德行四國順之

覺大也義取天子有大德行則四方之國順而行之

孝經卷四

孝經卷五

漢 鄭氏註

明後學東吳金 蟠訂

聖治章第九

曾子曰敢問聖人之德無以加於孝乎

參問明王孝理以教和平又問聖人德教更有大於孝不

子曰天地之性人為貴

貴其異於萬物也

人之行莫大於孝

孝者德之本也

孝莫大於嚴父

萬物資始於乾人倫資父為天故孝行之大莫過尊嚴其父也

嚴父莫大於配天則周公其人也

謂父為天雖無貴賤然以父配天之禮始自周公故曰其人也

昔者周公郊祀后稷以配天

后稷周之始祖也郊謂國丘祀天也周公攝政因行郊天之祭乃尊始祖以配之也

宗祀文王於明堂以配上帝

明堂天子布政之宮也周公因祀五方上帝於明堂乃尊文王以配之也

是以四海之內各以其職來祭

君行嚴配之禮則德教刑於四海海內諸侯各修其職來助祭也

夫聖人之德又何以加於孝乎

言無大於孝者

故親生之膝下以養父母日嚴

親猶愛也膝下謂孩幼之時也言親愛之心生於孩幼比及年長漸識義方則日加尊嚴能致心於

父母也

聖人因嚴以教敬因親以教愛

聖人因其親嚴之心教以愛敬之教故出以就傅趨而過庭以教敬也抑擯養痛離舍饒枕以教愛

也

聖人之教不肅而成其政不嚴而治

聖人順羣心以行愛敬至禮則以施政教亦不待嚴肅而成理也

其所因者本也

本謂孝也

父子之道天性也君臣之義也

父子之道天性之常加以尊嚴又有君臣之義

父母生之續莫大焉

父母生子傳體相續人倫之道莫大於斯

君親臨之厚莫重焉

謂父為君以臨於斯恩義之厚莫重於斯

故不愛其親而愛他人者謂之悖德不敬其親而敬

他人者謂之悖禮

言盡愛敬之道然後施教於人達此則於德禮為得也

以順則逆天無則焉

行教以順人心今日逆之則下無所法則也

不在於善而皆在於凶德

善謂身行愛敬也凶謂悖其德禮也

雖得之君子不貴也

言悖其德禮雖得志於人上君子之不貴也

君子則不然

不悖德禮也

言思可道行思可樂

思可道而後言人必信也思可樂而後行人必悅也

德義可尊作事可法

立德行義不違道正故可尊也制作事業動得物宜故可法也

容止可觀進退可度

容止威儀也必合規矩則可觀也進退動靜也必合禮法則可度也

以臨其民是以其民畏而愛之則而象之

君行大事臨撫其人則下畏其威愛其德皆放象於君也

故能成其德教而行其政令

上正身以率下順上而法之則德教成政令行也

詩云淑人君子其儀不忒

淑善也忒差也義取君子威儀不差為人法則

孝經卷五